

FUAFUAGA FAATAATITIA MO LE VA'AIA LELEI O I'A MA FIGOTA

A LE AFIO'AGA

O

SIUFAGA FALELATAI

(Tusia : Aso 25 Ianuari, 2001)

Saunia:

Pule mamalu a Alii ma Faipule ma tagatanuu o le afio'aga o Siufaga, aemaise le lagolagosua a le Ofisa o Faigafaiva o le Matagaluega o Faatoaga ma Faigafaiva.

FAASOLOGA

FA'ALUPEGA O LE AFIO'AGA

**Afifio le Usoalii,
Alalata'i le mamali ia Falelatai**

1. FAATOMUAGA

O le faaitiitia o i'a ma figota i Samoa, e afua mai i le anoanoa'i o mafua'aga eseese. O nisi o nei mafua'aga e aofia ai:

- Le tanumia o vaega o le gataifale mo le eleele-fou (fanua)
- Le soona fagotaina faa-le-tatau o le gataifale e le aufaifaiva
- Faaaogaina o faigafaiva-le-talafeagai
- Ma aafiaga mai i afa malolosi (Ofa 1990, Val 1991, Heta 2004) ua tuanai

O nei faafitauli o loo tulai mai pea i gataifale o si o tatou atunuu ma o le a avea lea ma auala e faaitiitia ai i'a ma figota. O le faaitiitia o i'a ma figota, o le le maua foi lea e tagatanuu o porotini mai nei meaai sami. O se atugaluga tele lea i le Malo o Samoa na mafua ai ona faatino nisi o tulafono e pei ona faailoaina atu i lalo.

Tulafono Autu Tau Faigafaiva

O le tausaga e **1998** na pasiaina ai e le Kapeneta le **Tulafono Autu Tau Faigafaiva** e faamalosia ai le : (i) laiseneina o vaa-fagota mo fagotaga, (ii) faasaina le faia o faigafaiva-le-talafeagai i ogasami o Samoa. Peitai ane, o nei tulafono uma e lei silafia e le toatele o tagatanuu o Samoa i ia vaitaimi. O se tasi o mafuaaga, ona o le toaitiiti ma le toagaogao o le aufaigaluega. Ae o se isi mafuaaga ona o le toaitiiti ma le toagaogao o le aufaigaluega. Ae o se isi mafua'aga, ua talitonu le taofi na faigata ona ausia ai lea tulaga ona e le'i iai se polokalame i lea vaitaimi e pei o le Polokalame o le Faasao o le Gataifale o Nuu ma Afio'aga. O lenei polokalame e pei ona faatinoaina nei, ua fesoasoani tele i le faamalamalamaina mo le silafia e le mamalu o le atunuu o ia tulaga.

Tulafono Faatonutonu mo le laiti o I'a ma Figota

I le tausaga e **1995** na pasiaina ai e le Kapeneta le **Tulafono Faatonutonu e Faatapulaaina ai le Laiti o I'a ma Figota**. O lenei tulafono na pasiaina ma le faamoemoe e tuu avanoa ma fesoasoani i le faasaoina o i'a ma figota ua tauau ina mou atu. O le faatapulaaina o le laiti o i'a ma figota e faataga mo le fagotaina ina ia ausia le lapopoa ina ia mafai ona tautuufua ma fanafanau, e faatupula'ia ai le faitau aofa'i o le tamaoiga o le gataifale.

Tulafono Laiti

O **Tulafono Laiti** a nuu ma afio'aga ua amana'iaina e le Faamasinoga. O se tasi lea o auala ua tuusao ai e le Malo le malosi i nuu ma afio'aga e mafai ai ona latou molia i le tulafono soo se tagata e le usita'ia tulafono ua aiaia i totonu o le Tusi Taiala a le afio'aga o Vailoa Aleipata. O nei tulafono o loo i lalo o le vaega o Tulafono ma Faasalaga o le Tusi Taiala aua le pulea tatau ma le va'aia lelei o le gataifale i tulaga o ona tamaoiga ma lona siosiomaga mo se lumanai manuia. O tulafono laiti e soalaupule ma autasi iai le Pule Mamalu a Alii ma Faipule o afio'aga taitasi.

Tala'aga : polokalame o le Faasaoina o le Gataifale i Alalafaga ma Afio'aga

O le Polokalame o le Faasao na amataina e le Ofisa o Faigafaiva i le tausaga e 1995. I le amataga mai la o lenei polokalame sa lagolagoina malosi e le Malo o Ausetalia e tauala mai i le AusAID le faatupeina mo le 5 tausaga seia oo mai i le tausaga e 2000, ma faamuta ai loa lana fesoasoani. I lea lava tausaga, sa tauaveina mai ai loa e le Malo o Samoa le faatupeina o lenei polokalame taua. O le talitonuga ma le faamoemoe autu o le tele o nei afio'aga, o le a silasila lea i le lumanai manuia mo tagata lautele o le afio'aga aemaise ai o tupulaga lalovaoa.

O le polokalame o le faasao e galulue soosoo-tau'au ai le ofisa ma afio'aga taitasi i nisi o fuafuaga faataatitia aua se lumana'i manuia aemaise o le toe faa-tamaoigaina o le gataifale. I le amataina o lenei polokalame, e faatinoaina ai ni faatalatalanoaga ma vaega eseese o le nuu, e peio le vaega a matai, tina, ma aumaga. E nei fefaasoaiga e faailoa mai ai faafitauli o loo faafeagai ma le gataifale o le afio'aga. E talanoaina foi aafiaga na mafuaaga o nei faafitauli ms soalaupule ai ni fofo. Sa soalaupuleina loa e Alii ma Faipule, tagatanuu o le afioaga ma le ofisa nisi o fuafuaga faataatitia e foia ai nei faafitauli. O se faaitaitaiga o se fuafuaga faataatia a le afio'aga i lenei polokalame, o le faia lea o se ogasami faasao e faasa ona solia, kolosiina pe fagotaina foi.

O nisi fuafuaga faataatitia e tele ona faaaogaina mo le pulea ma le va'aia lelei o le tamaoaiga (i'a ma figota) o le gataifale e aofia ai le faasaina o:

- Vilaau oona
- Fanai'a
- Ava-niu kin
- Tu'iga, faamoa, saeuga
- Fagotaina o i'a ma figota laiti
- Upega ma tili matanini'i
- Lama moli-uila i po

O nisi o fuafuaga o Tusi Taiala i le tele o afio'aga mo le pulea tatau ma le va'aia lelei o le siosiomaga o le gataifale e aofia ai le:

- Aoina o le alamea (crown of thorns)
- Faasaina le laueseina o oneone mai le matafaga
- Faasaia le lafoai o lapisi i le gataifale (matafaga)

O lenei polokalame e taua tele mo le lumanai manuia o Samoa ma ona tagatanuu. O le faaleleia o le siosiomaga ma le faatuputupulaia o le tamaoaiga o le gataifale os e faamoemoe e talitonu e mafai ona faatinoina i o tatou lava lima. E faa-tauaina tele le lagolagosua a le Pule ma le Faamalumaluga a Alii ma Faipule o afio'aga i lenei polokalame.

2. FAAMATALAGA E UIGA I LE AFIOAGA

2.1 Faamatalaga o Foliga Va'aia Faanatura o le Afioaga

O le afio'aga o Siufaga Falelatai e i le itu i Sisifo o le motu o Upole ma o lona faitauaofai e pe a ma le 800-1000 tagata, e aofia ai matai, tina ma tamaitai, aumaga, alo ma fanau. E le o aofia ai i latou ua faimalaga atu i atunuu i fafo ma aumau ai.

TAPUAIGA MA AOGA

O le E.F.K.S, Mamona, ma le Katoliko o lotu ia loo i le afio'aga o Siufaga. O le aoga tulaga lua, e na o le pau lea o le aoga i totonu o le afio'aga, ma le aoga maualuga a le itumalo.

FOLIGA FAALLENATURA

O Siufaga e iai lona a'au e maua le 1600-3200 mita lona umi, ma o le mamao o le a'au mai le matafaga pe a ma le 250-300 mita. O le vaega pito i loloto o le aloalo pe a pe le tai, e tusa ma le 9-10 futu i le taimi nei. Ae peitai, ae lei afaina i afa malolosi o Ofa ma Valelia, o vaega pito i loloto o le sami, na o'o atu i le 2-3 futu.

2.2 Faigafaiva

O le afio'aga lenei o Siufaga Falelatai, e fai lava si toatele o ona tagata e faalagolago i le sami mo le tausiga o aiga, atinaeina o le afio'aga, aemaise o le tua iai mo faalavelave ma mea faale-lotu. Ua maitauina ai, le faitau aofai o tane e fagogota i le sili atu ma le tasi le aso i le vaiaso, e 30-40, ae o tina, ua faamauina, pe a ma le toalusefulu tina fagogota. E le gata i lea, ae e toatele foi i latou e fagogota i tua'au i le tasi le aso o le vaiaso. E tele naua paopao e faaaogaina e tagata faifaiva; a le 10 e 15 paopao e fagogota i le vaiaso. Peitai, e leai se alia fagota e faafaigofie ai fagotaga a le afio'aga, aemaise lava i tua'au. E le faatagaina ni tagata fagogota mai isi afio'aga ona fagogota i le gataifale o Siufaga.

3. ITUAIGA I'A MA FIGOTA

Ituaiga I'a / Figota	Ituaiga Faigafaiva	Taimi faaalu mo le tasi tau'i'a/ 10 i'a/ ofu (itula)		
		Taimi nei	10 tausaga ua te'a	
I'a maua soo (5) :				
1	Pauulu	Lama	2 itula	Le atoa se itula
2	Gatala	Fana	2 itula	Le atoa se itula
3	Tifitifi	Fana	2 itula	Le atoa se itula
4	Pone	Fana	2 itula	Le atoa se itula
5	Mataaleele	Fana	2 itula	Le atoa se itula
Figota maua soo (3) :				
1	Sea	Tuisea	Sili atu ma le itula	Le atoa se itula
2	Gau	Fai gau	Sili atu ma le itula	Le atoa se itula
3	Fugafuga	Fai fugafuga	Sili atu ma le itula	Le atoa se itula

4. VAEGA TAUA O LE SIOSIOMAGA

VAEGA	Vaega taua (sikuea mita)	
	Taimi nei	
Togatogo	30 eka	30 eka
Amu	2/3 o le a'au	2/3 o le a'au
Vaovao o le sami	1/3 o le a'au	1/3 o le a'au

5. KOMITI O LE FAASAO : SIUFAGA FALELATAI

O lenei faamaumauga o suafa o le Komiti na faafouina ia Aperila 27, 2006. ua toe faaopoopoina nei le aofa'iga o le Komiti i nisi sui matai fou ma na tulai mai le aofa'iga o le komiti i le 24 sui auai.

- | | | | |
|----|---------------------|----|-------------------|
| 1 | Faalavaau Leaia | 13 | Faaliuga Ise |
| 2 | Faalavaau Taifafo | 14 | Misa Vaofusi |
| 3 | Faalavaau Pale | 15 | Malei Vatau |
| 4 | Taefu Fiauu | 16 | Tanumoa Lemu |
| 5 | Tanumoa Faavae | 17 | Patea Siumu |
| 6 | Gafatasi Uale | 18 | Taefu Fiaula |
| 7 | Faalavaau Simona | 19 | Misa Liki |
| 8 | Faalavaau Moa | 20 | Taefu Masi |
| 9 | Faalavaau Pelenato | 21 | Taefu Maletino |
| 10 | Taefe Taefu Tautunu | 22 | Taefu Epa |
| 11 | Sila Tai | 23 | Faalavaau Viliamu |
| 12 | Taefu Semo | 24 | Taefu Li |

6. TULAFONO O ASO UA MAVAE MA ASO NEI

Fasaina faigafaiva le talafeagai:

- Fanai'a
- Ava niukini
- Vailaau oona

O nei tulafono o loo faamamaluina ma amanaiaina i le pule mamalu a Alii ma Faipule o Siufaga e oo mai i le taimi nei. O le tofa autasi i le paia i le afioaga e faatinoina le polokalame o le puleaina o faigafaiva ma le vaiaa lelei o i'a ma figota, o se fuafuaga talafeagai lea mo le toe faamalosi ma le faamauina pea o nei tulafono i totonu o le afioaga.

O nei fuafuaga uma o loo aafia i le pulega o le siosiomaga o le gataifale ma le vaia lelei o i'a ma figota.

E le gafatia na o le malosi faaletulafono a le Malo ona malu puipuia ai le siosiomaga o le gataifale ma ona tamaoiga. E utiuti tulaga tau tupe ma toagaogao foi le aufaigaluega a le Malo latou te faamalosia ma una'ia tulafono tau faigafaiva i nuu taitasi o Samoa. O le fofu talafeagai o loo i aao o tagata o loo soifua ma alaala i le afioaga faatasi ai ma le faamalumaluga a le Fono a Alii ma Faipule.

O lenei tali o le a le pine ona unaia tagata latou te galulue faatasi ina ia malupuipuia ma faaleleia le siosiomaga o le gataifale ma ona tamaoiga mo nei ma tupulaga o le lumanai.

7. AUTU

O le faamoemoe maualuga o lenei polokalame ina ia faaleleia le soifua manuia o tagata o le afioaga, ma ia faatupula'ia atili mea taumafa mai le sami. O lea e manaomia ai tagata uma ina ia avea nei faatinoga e puipuia ai le siosiomaga o le gataifale ma ia fuafua tatau ai le fagotaina o i'a ma figota. O nei fuafuaga ua tusia i lalo na faaalua e le Komiti Faufautua e avea ma autu:

“Ina ia puipuia le siosiomaga o le gataifale ma toe faatupula'ia ma figota mo tupulaga o le lumanai”

Ua ioeina e le fonotaga a le Komiti Faufautua i le Aso 7 Tesema 2000, o le Komiti lava lenei latou te faamalosia ma unaia vaega eseese uma o le afioaga aua le puipuia ma le faasaoina o atinae ma alamanuia o le gataifale o Siufaga. O lenei foi Komiti o loo nafa ma le tapenaga o tulafono aemaise o vaega uma mo lenei Tusi Taiala. O le tele foi o nei tapenaga, o le a tuuina atu i le pule mamalu a Alii ma Faipule mo le pasiaina. O lenei fuafuaga ua faamoemoe ina ia oo atu i le tolu tausaga o loo faaogaina pea, ae peitai, afai ae iai se suiga, ua ao loa ona toe iloilo lenei Tusi Taiala.

8. TAPENAGA

O lenei tapenaga sa saunia lava e tagata o le afioaga o Siufaga, faatasi ai ma ni fautuaga ma le lagolagosua a le Ofisa o Faigafaiva. O se ootoga lenei o le tapenaga o le Pulega o le Siosiomaga o le Gataifale ma le Vaia Lelei o I'a ma Figota.

Feiloaiga Muamua

O le feiloaiga muamua sa faafesootaia lea e Mauisii Mose i le Aso 15 o Setema 2000. O le masina o Oketopa i lona aso 11, sa tauaofia ai le uluai fono a sui o le Ofisa ma le Afioaga mo le faamalalamaina ma le taliaina o lenei polokalame.

Feiloaiga ma Vaega

O vaega sa vaevaeina iai e aofia ai Matai, Aumaga ma le Vaega a Atina ma Tamaitai. Sa feiloai nei vaega e tolu ma sui o le Ofisa o Faigafaiva ma faatalatalanoaina ai faafitauli o le gataifale o loo alia e le afioaga ato ai ma ni fofu talafeagai e faaono foia ai nei faafitauli.

Komiti Faufautua

O lenei komiti o loo aofia ai sui na filifilia mai i vaega taitasi, latou te molia finagalo faaalua o vaega eseese i le fono a le Komiti. O lenei Komiti latou te tuufaatasia faamaumauga ma faamatalaga mai i nei vaega taitasi, ma sa mafai ai ona latou tapenaina se ata faataitai o le Pulega o le Siosiomaga o le Gataifale ma le Vaia Lelei o I'a ma Figota (Tusi Taiala). O lenei fuafuaga o loo aafia ai lagona o tagata o le afioaga i le puleaina o Faigafaiva ma le siosiomaga o le gataifale.

Tauaofiaga o le Fono Tele

O le tauaofiaga o leni Fono i le Aso 25 o Ianuari 2001, na taliaina ai leni Tusi Taiala, o le Fuafuaga o le Pulega o le Siosiomaga o le Gataifale ma le Vaaia Lelei o I'a ma Figota.

9. TULAFONO MA FAASALAGA

O tulafono ma faasalaga o ni fuafuaga faataatitia ua faamoemoe e faaono foia ai faafitauli ua faaalua ma faailoa mai e vaega eseese o le afioaga. E lua (2)

Ituaiga o fuafuaga faataatitia ua fuafuaina, o (i) : fuafuaga faataatitia mo le afioaga ma (ii) : fuafuaga faataatitia mo le Ofisa o Faigafaiva. O fuafuaga ua aupito sili ona taua, o fuafuaga faataatitia lea ua faaagaaga mo le afioaga.

O fuafuaga faataatitia mo le Ofisa o Faigafaiva o le tuuina atu lea o fautuaga ma fesoasoani aua le tapenaina o le faamoemoe e pei ona fuafuaina. O gaioiga uma lava e faatino e le Ofisa e ao ona faamaonia e le Alii Pule Sili o Faigafaiva. O nei fuafuaga faataatitia ua faamoemoe lo latou faataunuuna i le lagolagosua mai o le afioaga ma ona tagatanuu.

9.1 Faasaina Fanai'a, Ava Niukini ma Vailaau.

O nisi o auala tau faigafaiva ua mautinoa lo latou tulaga ogaoga i le faatamaia o le alititai (amu) ma le tele o meaola o le gataifale o faigafaiva-le-talafeagai e pei o vailaau ta-lavalava (chlorox), ava niukini ma fanaia. Ua le gata ina faatamaia ai se vaega tele o le alititai (amu) ae ua faapena foi ona faaumiumi se taimi e toe taumafai ai e faatupuina le tele o meaola o le gataifale ua aafia ma mamate i nei ituaiga auala faafaigafaiva. A faaleagaina le alititai, o lona uiga o le a leai ni i'a ma ni figota e toe maua ai.

Fuafuaga Faataatitia a le Afioaga

O nei tulafono e pei ona taua i luga, ua leva ona faamamalu mai e le afioaga, aua ua silafia e le afioaga le taua ma le aoga o nei fuafuaga, ma o loo faamauina pea faatasi ma le lagolagosua iai a le ofisa o faigafaiva. O le fautuaga, ina ia faamalosi ma faamamaluina pea lea tulafono taua a le afioaga mo le faasaina o faigafaiva-le-talafeagai.

Tulafono

Mo le mamalu o le atunuu atoa ai ma tagatanuu o le afioaga o Siufaga, ua matua faasaina lava soo se tasi ona toe faatinoina faigafaiva-le-talafeagai e pei o fanai'a, ava niukini ma vailaau oona i gataifale o leni nuu.

Faasalaga

Mo tagata o le afioaga e faaaogaina fanai'a mo fagotaga, o le a faia iai le finagalo o Alii ma Faipule, o le a faatulaiese lea ma le afioaga.

Mo tagata o le afioaga e faaaogaina ava niukini ma vailaau oona i fagotaga o le a faasalaina i le 5 aumatua (puaa) poo le \$500.00.

O tagata mai isi afioaga, o le a molia i le Tulafono Autu Tau Faigafaiva ma Tulafono Laiti a le afioaga.

Taimi Fautuaina

Ina ia aloaia le faamamaluina ma le faamalosi o nei tulafono, pe a mavae le Fono tele e pasia ai le Pulega Tatau o le Gataifale ma lona Siosiomaga faapea ai ma le Vaaia lelei o i'a ma figota i le Aso 25 o Ianuari, 2001.

Fuafuaga Faataatitia a le Ofisa

O le a fesoasoani le Ofisa o Faigafaiva mo le faatinoina o fuafuaga faataatitia a le afioaga e ala atu i le tapenaina o ripoti mo le tuuina atu i ofisa o faamasinoga mo le faamasinoina o i latou ua solia leni tulafono taua.

9.2 Faasalalauina Tulafono a le Afioga

O le faasalalauina i leitiu, televise ma nusipepa o nisi ia o auala talafeagai lelei e momoli atu ai ni feau taua aemaise ai o le faalauteleina o ni fuafuaga ua saunia. E le gata i lea, o le a silafia ai e le mamalu o le atunuu, malamalama ma manino lelei i le aotelega o le faatauaina, ma le malu puipuia o le siosiomaga o le gataifale o le afioga.

Fuafuaga Faataatitia a le Afioga

Ua faaalua mai e le Komiti le taua o le faasalalauina o tulafono a le afioga ua faamoemoe ma faaagaaga mo le puipuia o le siosiomaga o le gataifale ma ona tamaoaiga. O le a faasalalauina e le afioga tulafono ole gataifale ma ua iai le faamoemoe a le komiti, o le a avea nei tulafono ua fausia e fai ma tulafono lagolago a le Malo. E avea foi lea ma auala e faalauaitele atu ai i soo se tagata o alaala i le afioga o Siufaga ma le mamalu o le atunuu le puipuiina o le gataifale o le afioga.

Autu o le Faasalalaua “Puipuia o le Gataifale o Siufaga Falelatai”

Fuafuaga Faataatitia a le Ofisa

O tulafono uma a le afioga mo le puipuia o le gataifale e tataua ona sainia e le Alii Pule Sili, Afioga ia Seumanutafa Iakopo Malaki, o le Matagaluega o Faatoaga ma Faigafaiva, ina ia mafai ona avea ai ma tulafono laiti o Faigafaiva (by-laws). O faasalalaua o nei tulafono o le a gafa lea ma le Ofisa o Faigafaiva.

9.3. Faasaina Tu'iga ma Faamo'a

O amu ua maitauina lona taua i le siosiomaga i le gataifale ona ua mautinoa ua avea lea ma nofoaga o figota ma i'a faapea ma isi meaola o le sami. Afai o le a faatamaiaina amu, o lona uiga ua aafia foi meaola o loo nonofo ai.

O tuiga ma faamoa o se tasi leni o ituaiga o faigafaiva e le talafeagai ua matua faaleagaina ai amu aemaise i'a ma figota laiti. Afai ae faaauuina pea nei ituaiga faigafaiva, o lona uiga o le a sili atu ona tele se afaina o amu o loo fai ma ofaga ma nofoaga o i'a ma figota o le gataifale.

Fuafuaga Faataatitia a le Afioga

Na faaalua e nisi o vaega o le afioga, e ui lava ina e le o toe vaaia leni faigafaiva ae e ao lava ona faia se tulafono e faasaina ai leni ituaiga o faigafaiva.

Tulafono

Ua matua faasaina ona toe faatinoina tuiga poo faamoa i le gataifale o Siufaga Falelatai.

Faasalaga

O tagata o le afioga o le a solia leni tulafono, o le a faasalaina i le 5 aumatua poo le \$500.00.

O tagata mai isi afioagae solia leni tulafono o le a molia sao i le Tulafono Autu Tau Faigafaiva ma Tulafono Laiti a le afioga.

Fuafuaga Faataatitia a le Ofisa

O le a fesoasoani mai le Ofisa i le faamautuina ma le faamalositia o leni tulafono. E lagolagoina foi e le ofisa soo se fuafuaga ua talafeagai lelei ma le tulafono mo le faasaina o amu. E fesoasoani foi le ofisa i le moliaina o i latou ua molimauina le solia o leni tulafono.

9.4 Ia faasaina ona lafoai lapisi i le Sami

O le lafoai o otaota poo lapisi i le sami, ua avea ma mafuaaga e manunua ai nisi o le aufaifaiva i atigiapa, atigifagu ma uamea. Ua faapea ona tulai mai foi, o se faatinoga le talafeagai mo le ola lelei o i'a ma figota o le gataifale.

Fuafuaga Faataatitia a le Afioga

Ua faaalua e le Komiti, o loo iai le tulafono a le afioga mo le malu puipuia o le tulaga i lapisi o loo

lafoai i le sami ma ua fautuaina ai le faamalosia o lea tulafono aua le faaleleia male puipuia o le gataifale.

Tulafono

Ua matua faasaina lava soo se tagata ona toe lafoaia lalisi e pei o atigiapa, atigifagu ma pepa iila i le sami o Siufaga Falelatai.

Faasalaga

O tagata o le afioaga o le a solia lenei tulafono, o le a faasalaina i le \$50.00.

O tagata mai isi nuu, o le a molia i le Tulafono Laiti a le afioaga.

Fuafuaga Faataatitia a le Ofisa o Faigafaiva

O faamatalaga eseese e faatatau i aafiaga o le gataifale ma ona tamaoiga o le a fesoasoani atu ai le ofisa e fautuaina le afioaga i le taua o le teu maluina o lalisi ma otaota i nofoaga talafeagai. O le a tuuina atu foi ni pepa o faamatalaga mo le faalateleina o le malamalama i ia tulaga.

9.5 Faasaina le fagotaina mai o I'a ma Figota Laiti

O le fuafua tatau o le fagotaina mai o i'a ma figota o se itu lelei ma talafeagai lea mo le faasaina ma le toe faatupulaia o meaola o le gataifale. O lenei fuafuaga o le a mafai ona maua ai le avanoa e i'a ma figota laiti e tutupu ma fanafanau ai, i le uluai taimi a o le i oo i le lapoa (matua) e fanafanau ai. O lona uiga, o le a leai sona sao mo le isi augatupulaga e sosoo ai. Afai la o le a faaauu ai pea lea tulaga, o lona uiga, o le a saga faaititia pea le faitauaofai o i'a ma figota ma faasolo lava ina mou malie ese atu.

Fuafuaga Faataatitia a le Afioaga

Ua faaalia e le komiti lo latou lagolagoina o le Tulafono Faatonutonu o Faigafaiva ua pasiaina nei o loo aiaia ai fua faatupulaa o le laiti o i'a ma figota e tatau ona fagotaina. Na taua foi, o le faamalosia o lenei tulafono, o le a iai pea lea i le pule mamalu a Alii ma Faipule faapea le susuga i le Pulenuu ma le Komiti.

Tulafono

Ua matua faasaina ona toe fagotaina i'a ma figota laiti mai le gataifale o Siufaga, ua lagolagoina foi e le afioaga le tulafono a le malo e avea ma taiala.

Faasalaga

Mo tagata o le afioaga e solia lenei tulafono, o le a faasalaina i le \$100.00.

Mo tagata mai isi afioaga o le a molia sao i le Tulafono Faatonutonu a le Ofisa o Faigafaiva.

Fuafuaga Faataatitia a le Ofisa

O le a fesoasoani atu pea le ofisa i le faamautuina o lenei tulafono ma tufaina atu pepa o faamatalaga o nei tulafono ma faamalamalama atili ai, mo le silafia e le mamalu o le aunuu. O le a mafai foi ona tapenaina se ripoti o le ua molia mo le tuuina atu i le faamasinoga.

9.6 Faasaina Pa-I'a, Upega ma Tili Mata-Nini'i

O le faaogaina o pa-i'a, upega ma tili mataninii, ua maituina le tele o i'a laiti ua faatamaia ai. Ua iai le talitonuga o le a oo atu i se tulaga faaletonu i'a maua, pe a faaauuina pea le faaogaina o nei ituaiga faigafaiva. O le a oo ina faaititia i'a e mafai ona oo atu lo latou lapopoa e maua ai le avanoa e fanafanau ma tautuufua ai.

Fuafuaga Faataatitia a le Afioaga

Ua faailoa mai e le komiti, o le faaogaina o upega ma tili mata-ninii, o se tasi lea o mafuaaga ua faaititia ai i'a maua i le gataifale. ua faapena foi ona faaalia mai e le komiti lo latou matua lagolagoina o le Tulafono Faatonutonu ua iai nei mo le faatupulaaina o mata-uega ma tili mataninii.

Fautuaga

Ua fautuaina e le Pule Mamalu a Alii ma Faipule atoa ai ma le komiti le mamalu o le afioaga ina ia lagolagoina le tulafono o upega ma tili mataninii ua pasia e le Malo.

Tulafono

Ua matua faasaina lava mata-upega e i lalo ifo o le 2 inisi mo upega tatao ma pa i'a, ma mataupega 1.2 inisi mo tili, ona toe faaogaina i ni fagotaga i le aloalo o Siufaga Falelatai.

Faasalaga

Mo tagata o le afioaga e solia lenei tulafono, o le a faasalaina i le \$100.00.

O tagata ese o le a molia sao i le Tulafono Faatonutonu o le laiti faatapulaaina o I'a ma Figota.

Fuafuaga Faataatitia a le Ofisa

O se lagolagosua mai le Ofisa o Faigafaiva le tuuina atu lea o pepa o faamatalaga e saga faamautuina ma faamaopoopoina ai lenei tulafono. O le a tapenaina foi ripoti e molia ai i latou ua molimauina le solia o lenei tulafono.

9.7 Faasaoina Togatogo

O togotogo o se tasi lenei o vaega ua tele sona sao i le gataifale mo le faatupuina o nisi o i'a ma figota. O le taua o le faasaoina o togotogo, ona o nisi meaola ninii o le gataifale ua avea lea nofoaga ma vaega e sulufai iai mai o latou fili, ao nisi i'a ma figota ua avea togotogo ma nofoaga e fanafanau ma tautuufua ai.

A tanumia pe taina i lalo ma faaleagaina togotogo, o lona uiga o le a faaitiitia i'a ma figota mo tupulaga o le lumanai.

Fuafuaga Faataatitia a le Afioaga

Ua ioeina e le komiti le tatao ona faamalosia le faasaoina o togotogo ona o le fia faasaoina pea o i'a ma figota ma isi meaola o loo avea lea vaega ma nofoaga e fanafanau ai. O le faasaoina o lenei togotogo o le a faamalamalama e le pule mamalu a Alii ma Faipule o Siufaga.

Tulafono

Ua matua faasaina lava ona toe taina i lalo ma faatama'ia togotogo o loo ola i totonu o lenei afio'aga.

Faasalaga

O tagata o le afioaga e solia lenei tulafono o le a faia iai le finagalo o Alii ma Faipule o le afioaga.

O tagata mai isi afioaga o le a faasalaina i le \$100.00

Fuafuaga Faataatitia a le Ofisa

O le a tuuina atu e le Ofisa ni pepa o faamatalaga e faatatau i le taua ma le aoga o togotogo e faamalamalama atili ai lenei mataupu.

9.8 Ogasami Faasaoina

O se vaega o le gataifale ua faasaoina, e le tatao ona toe aafia i ni faigafaiva. O le avea o se ogasami o le gataifale ma vaega faasao, e ao ona aafia ai le malu puipuia o le siosiomaga ma ona tamaoaiga i figota ma i'a. O lenei vaega faasao, o le a faasaoina ai amu, aau faapea foi ma i'a ina i mafai ona maua e nei meaola le avanoae tautuufua ma fanafanau ai.

O le autu taua lava, o le a avea lenei faasao ma punaoa o i'a ma figota e mafai ai ona toe faaleleia nisi vaega o le gataifale ua afaina. O le a fanafanau ma tautuufua i'a ma figota o loo aumau i le vaega faasao ma tafea atu o latou fua fanau ma faatupuina ai nisimeola fou i nofoaga ua le maua ai ni i'a ma figota. O le a le pine ona manuia ai i tatou ae faapea foi tupulaga o le lumanai.

Fuafuaga Faataatitia a le Afioga

- Galulue faatasi ma lagolagosua i le afaigaluega a le ofisa o faigafaiva i le faatinoina o le iloiloga o le tulaga talafeagai o se vaega o lona gataifale e avea ma vaega faasaoina.
- Talanoaina ma auiliiliina le lipoti ma ia faia se faaiuga i le faavaeina o le ogasami faasaoina.
- Afai ae taliaina, ona faatinoina loa lea o fuafuaga mo le faavaeina o le vaega faasao e pei o le mataituina, tausiga ma le vaaia lelei o le ogasami faasaoina.
- Ia faamamalu foi le tulafono ua taua i lalo mo le puipuia lava ole ogasami faasao.

Tulafono

Ua matua faasaina lava soo se tagata ona uia, taele pe solia, poo le faatinoina ai foi o soo se ituaiga o faigafaiva poo se isi lava mea i totonu o lenei ogasami faasao o Siufaga Falelatai.

Faasalaga

Mo soo se tagata e solia lenei tulafono, o le a faasalaina i le 5 aumatua.

O tagata mai isi afioga, o le a molia sao i le Tulafono Laiti tau Faigafaiva.

Fuafuaga faataatitia a le Ofisa

Faatinoina le iloiloga o se vaega o le gataifale e avea ma ogasami faasaoina. O le a saunia foi le ripoti mo le tuuina aloaia atu i le komiti o le pulega o faigafaiva ma le fonu.

9.9 Iloiloina le Gataifale mo le Faafaatoagaina o I'a ma Figota

O le tufaina atu ma le faafaatoagaina, ua faatatau lea i le auina mai o ni figota poo ni i'a mai isi atunuu ma tufaina atu e faaolaina i se ogasami ua talafeagai. O le faa-faatoagaina ua faatatau lea i le faaolaina o figota i se nofoaga ua saunia. O nisi nei o atinae mo le faatupuina o figota aua le toe faatamaoigaina o le gataifale. O nei auala faa-atinae e moomia ai lava le galulue faatasi ma le faamaoni o le afioga ina ia ausia se taunuuga lelei.

Fuafuaga Faataatitia a le Afioga

- Galulue faatasi ma le afaigaluega a le ofisa o faigafaiva i le faatinoga o le iloiloga pe talafeagai ma lelei le gataifale mo le tufaina atu ma le faa-faatoagaina ai o figota.
- Auiliiliina o le ripoti i suesuega o le talafeagai ma ia faia se faaiuga i le faatinoina o nei atinae i totonu o Siufaga.
- Galulue faatasi mo le puipuia o nei atinae ma le vaaia o tagata o loo latou faatamaia ma solia tulafono e faatatau i nei atinae.

Fuafuaga Faataatitia a le Ofisa

O le a oo atu se alii ofisa mai le vaega suesue, ma suesueina le gataifale o le afioga, ina ia faamaonia le talafeagai mo le faaolaina ai o ni figota. O le a mafai ona tuuina atu ni figota pe afai o le a faamaonia le talafeagai o nei nofoaga mo ia atinae.

- Fesoasoani mai le Ofisa e ala lea i le vaaia ma le mataituina o le sologa lelei o le tuputupu ae o figota ua atinaeina i gataifale o Siufaga.
- Saunia ni aoaoga mo le faamalamalamaina o olaga faanatura o nei figota.

Faamatalaga Faaopoopo

O le tufaina atu ua faatatau lea i le aumaia o ni figota mai se isi atunuu e faaolaina i se ogasami ua talafeagai lelei. O le tufaina o le figota o le aliao e le tele o atunuu o le Pasefika ua mautinoa ai le tele o ni faamanuiga na mafai ona seleseleina e nei atunuu. I Fiti, na mafai ona toomaga iai tagata i le aano o le aliao e avea ma mea taumafa. O lona atigi na mafai ona faatauina atu e gaosi ai faamau o ofu i fale gaosi mea. I le Atu Kuki e tusa ma le 280 aliao na tufaina atu ai ma na mafai ona maua mai ai se aofaiga e tusa ma le 200 tone o atigi aliao i le tausaga na faatauina ai i fale gaosi faamau. I le 1990 na tufaina atu ai i sami o le motu o Namua i Aleipata le 400 aliao, ma na faatamaia i le afa malos i Ofa.

I le tele o vaega o aloalo ma aau o Samoa o loo maua ai figota e pei o le pae, asi ma le tugane. O nei figota, ua mautinoa lo latou faaitiitia talu ai le soona fagotaina e tagata mo taumafa, ae ua faapena foi ona faatamaiaina o latou nofoaga e afa malolosi. I le tele o nofoaga ua le toe maua ai nei figota, pau le faamoemoe o le aumaia lea o ni figota mai nisi atunuu ma tufaina atu iai aua le faolaina i nei vaega o le gataifale.

10. TALOSAGA

O nei talosaga sa mafai ona tuuina mai e sui o le afioaga sa auai i fonotaga ma le Ofisa o Faigafaiva i taimi o faatalatalanoaga i vaega taitasi. O talosaga uma foi la ua tuuina mai, sa faamautuina e le komiti i le latou fonotaga ma le Ofisa. O nei talosaga o le a mafai ona iloiloaina e le Ofisa o Faigafaiva mo le faataunuuina. O talosaga uma sa tuuina mai, o loo faailoa atu i lalo:

- Ogasami faasaoina
- Vaa fagota
- Tilapia
- Faisua

11. TOE ILOILOINA O LENEI TUSI TAIALA

O le a toe iloiloaina lenei Tusi Taiala mo le Pulea Tatau ma le Vaaia Lelei o le tamaoaiga ma le Siosiomaga o le Gataifale ma lona agai i luma. O le toe iloiloaina foi o lenei Tusi Taiala i nisi o auala e pui puia ai ma faamaopoopo ai le taua ma le aoga o lenei polokalame i totonu o nuu ma afioaga.

O lenei foi galuega e aofia ai le auiliiliga maumaututu o galuega fai a le afioaga ma le ofisa o faigafaiva i le faataunuuina o fuafuaga faataatitia e pei ona taua i luga.

O lenei foi iloiloaga e lipotia ai ni vaega poo ni tulaga ua lelei pe faaletonu foi i totonu o le polokalame talu ona faavaeina i totonu o le afioaga.

12. FUAFUAGA FAATAATITIA A LE AFIOAGA MA LE OFISA O FAIGAFAlVA

Ua iai le maliliega a le Komiti ma le Ofisa o Faigafaiva o le a toe auiliiliina lenei Tusi Taiala pe a maea le 6 masina talu ona pasia lenei Tusi i le Fono Tele (Ianuari 25, 2001). O le a toe feutagai le komiti ma le ofisa i se aso i le lumanai mo le toe iloiloaina o lenei Tusi Taiala mo le fia faaleleia ma le sologa lelei pea o le Tusi Taiala a le Afioaga o Siufaga Falelatai.

SIUFAGA FALELATAI – RIPOTI O LE FONOTAGA

- Aso o le Faatalatalanoaga : Aukuso 15, 2007
- Vaega Faigafaiva : Tafatoa Ferron Fruean, Aifiti Viane, Sefulu Leleimalefaga
- Togi o le Faatalatalanoaga : 87.17%
- Aofai o Faisua : 73 (Setema 2006)

1. UPU TOMUA

O le auai o le SIUFAGA FALELATAI i leni Polokalame mo le Faasaoina o le Gataifale e sili ona taua. O se fesili, pe mafua i se a ua faia ai leni mau? O le faatinoina o leni polokalame o le pulea tatau